

變雅堂遺集

詩二

黃岡杜濬撰

七言古詩

聖德昌

司閭不用髡黥之子營田不用雀鼠之兒闌葺有智大

朝何疑猗與聖德昌人不能知一解駢駮駑馬艇癡奚為

奈何呼之耳不聰一作聽刺之心愈聾使獨立八絃之上

彈五絃之琴目營四海怒如調饑二解女媧鍊石可以補

天大人先天而天不違玉衡可以正泰階可以平陛下

萬壽天知之

三解

言一
江水清且深

黃河深而不清溪澗之水清而不深尾海滄滄倚天一
碧中多蛟龍來往出沒徒好淫蛇龍猶自可蝦鼈愁殺
我三戶之郢持楚竹釣竿籜籜餌龍肉長跪請君且莫
釣魚烽火照江底魚龍豈不相攜徂春江花月夜辱我
太區區雲帆杭稻河伯不言祿但相借問今日亦何如
材官小臣指塞耳心知恃爾長江水

無渡河

河邪水邪厲揭邪烏樓一枝之木獸跼一垤之土湯湯
河流獨安爲家

無渡河利河不深升斗之水可以殺人安得爾渡爾竟
不渡予汝何親

無渡河利河口深蛇龍蠃蜒可以寒心安得爾渡爾竟
不渡予汝何禁

關山月

上有關山月下有隴頭水月照行人不記年流水無情
流不已月淒清水嗚咽非秦非漢腸斷絕

送將歸歌答方密之

送將歸當送誰君坐玉堂送布衣與君同庚復同志誓
佐中興衣錦醉君當三十先登壇青絲白馬官長安結

交貧賤信何益頻遭擯落勞君嘆君吟詩復作書送余
歸傷吳專諸余今寂寞已如此不愛專諸愛西子必得
功成遊五湖世上今無范大夫

合歡歌爲密之

密之既納燕姬周穎侯過我曰姬日作書數紙殆學者也又密之未納姬前曾

向余云因少此物覺簾外風聲一倍淒然詩中戲入此意

拒霜花淡燈花紅玉釵半墜羅幃中嬌娘欲語郎語同
簾前簌簌誰家風曉起畫眉銅雀瓦蘭亭真書看儂寫
由來南國有佳入不及北方之學者

醉歌行呈曹秋岳龔孝升鞏鴻圖諸公

狂夫落魄翻厚顏累日雜坐公卿閒仰天大笑如得意

到處可醉忘遷山昨日作詩賀花燭筆底新人美如玉
今朝倦札索湖縣札止一學人皆傳余與密之索縣札
止一縣字大書
醉時似醒醒似醉楚語吳語惟其意獨怪平生老布衫
三日一浣襟前淚

別傅山貽

吾翁若翁結交時君與賤子俱童兒吾翁下第若翁泣
異姓骨肉何其奇倏忽交期成兩世君復眼看余下第
長安東西塵隔斷誰肯斯時尋舊契感君載酒話離情
解衣脫帽贈予行依稀三十年前事今日臨歧再失聲
朱將軍騎射篇跑馬飛鳴鏑俯身左右拾之
以爲戲耳不立的也自注

東風吹野草欲柔將軍角弓閑自秋是日將軍醉中望
駿馬驕嘶故相傷將軍上馬不揖客去若抽帆沒浩蕩
雙耳蕭條劈風雨四蹶一綫開塵埃馬正急時弓始圓
回韁瞥見何能全從來破的久會厭別遲天喬全可傳
霹靂排風發一矢有聲刮地如鼓止馬來赴矢如赴的
咫尺翻然別有適不知俛仰試舉旗但怪縱橫再鳴鏑
盤馬戲馬馬無骨左射右射矢飄忽一矢連連化千萬
其起爲兔落爲鶻觀者挨肩立不疲驩呼力敵惟有癡
將軍下馬矢歸韞有客有客乃惆悵
雨霽邢子孟貞來歌

一春苦雨雷轟轟傾聽不聞故人聲故人詠梅在官閣
梅花落盡春不晴今旦雲開日暫光故人造我羈旅堂
喜對故人見新霽況聞佳句潤枯腸苔草斑斑上階翠
破硯殘書皆有意問我近狀無近狀時復不炊祇舊事
只今旋煮一盤蔬故人來共味有餘但恨故人不飲酒
解衣卻換亦何有勸君從此學舉杯醒眼看時卻非厚
大椿樹歌

此樹何年萌蘖生何年枝節初縱橫蒼根拔地一百尺
翠蓋團空類削成秋天東西各落葉春日南北殊洗鶯
茫然歲月不可紀屹立終古江東城我來作客十年外

數看何曾樹加大始知稍長鬪百年歎此魁梧丈夫最
盤桓常恐鬼神誚寂寞惟同知己慨三夏之日尤堂堂
入樹出樹分陰陽狂飈拂顛隱霹靂微颺送冷餘雪霜
擔夫暫息廢襜褕行子久坐思衣裳頗聞楚客嘗再拜
焉用匠石來徬徨不矜不詭自不羣遠看疑嶺雨疑雲
根孤白日那得照約略十畝無斜曛可惜仙材不得地
市井紛紛敗人意偏側思將大千庇豈若嗟義近山翠
居人致辭更酸鼻北枝今年忽顛顛爾樹何知恨何事
爾不見木末亭秋來萬樹猶青青只今零落無四五如
囚如泣如晨星又不聞有山封神烈大樹崔嵬萬仞鐵

一朝巨斧施列缺剝膚見骨山流血椿乎椿乎何壽考
八千歲春幾春了若有人兮念天地之悠悠視爾大椿
猶寸草

書黃甫及册子因贈

杜陵寂寞將欲死劉郎贈我淮南子淮南爲人卓且眞
磊落不染半點塵讀書一目數行下說劍凜凜如有神
雲霄不垂韓信釣徐泗正與黃公鄰橋邊墮履臭味合
臺上落帽風致親如此之人恨不相逢早吳宮未埋幽
逕草京都繁華未銷歇健兒身手各未老於今萬事皆
雨散才士相看惟有嘆雖然才士變化烏得知學仙學

佛猶爾爲

公允屢招擊時鮮戲爲歌

劉郎得鮮卽相招佐以肥筍開香醪我來談笑恣飲啖
往往醉飽無所逃咫尺夜禁十二重每歸脫帽長呼號
唇焦舌敝不知悔來夕復至如晚潮爲口奔波吾不惜
第恐慣習成腥饗我其結網學爲漁日得此物充我庖
劉郎笑我計太左古來漁子皆徒勞何況今日事復殊
思鱸步兵豈得高橫流浩浩昔所嘆公無渡河古所譌
此物初出價千錢網者不足食者饒比君網成時已過
山東李白空釣鼈不如明日還過我腹腴歡爾何其豪

贈剩公

山僧遠從嶺南萬里來
四百七十二峰生
莓苔肩橫柳栗不着一絲掛
開口大笑中悲哀
借問山僧之笑何其
哀
山僧不哀世人不作佛
且哀世人不作人
則是胡爲乎來哉
前月別我遊毘陵
有鄒先生者知僧
兩人閒借支石藤
語默夜共龕前燈
歛然而旋復
何有顧我垂楊生
左肘醒人說夢
夢不醜我不礙
茶君避酒憑君
放眼閱盡東西南
北人畢竟金鱗
落在釣竿手
賦得烏啼白門柳

白門昔日全盛時
千門萬戶楊柳枝
楊柳多時覺烏少

紅樓熟睡忘春曉
斬伐於今稀復稀
自從去年無絮飛
惟見饑鳥逐人肉
鳥多一半城頭宿
僂家垂柳餘一株
啞啞嘗聚千百鳥
僂愁僂倦耽春睡
其奈羣鳥繞樹呼
衡水梨歌東謝趙子

異哉此梨佳莫比
不產交河產衡水
淺指先驚雪水流
深嘗詎數蜂脾美
吾聞哀梨畏蒸食
用違其材物之賊
一片冰心託玉壺
正索解人不可得

歸不得行

杜陵老翁歸不得
黃河之水聞歎息
赫蹏乞米常厚顏
艱難轉不憂無食
獨傷百日棲荒寺
涼燠循環豈終極

初來北郭喚催耕
臨去西堂鳴促織
中閒毒熱不可當
五月披裘心自惻
典盡寒衣縫葛裳
漫向人前炫要襖
青氈鐵研今何在
買薪賣到書與墨
老僧日日問我行
使我低頭惟默塞
積逋凌雜難具陳
豈第少渠僑賃直
況復無端迂俗兒
窮途苦澁添荆棘
不知忍恥復誰待
平生故人萬夫特
嘗將松柏比君心
常將山岳方君德
癩疥爲災祇妒予
咫尺不得見顏色
昨日緘書汗流頰
今日題詩淚霑臆
老翁他事休再論
歸飛願借扶搖力

唐港耕人歌

黃河北岸飛黃沙
倪生有田河水涯
地名唐港濱瘠鹵

耕種不熟催科譁大兵四征復加派公庭使費紛如麻
借問此田胡久留誰愛苦李求匏瓜倪生昔日有此田
無米納稞猶安然三二年來家屢空安得飽飯還晏眠
佃人走散老特死田生白草如窮邊倪生一朝長嘆息
驅我力作宦非天東鄰借錢鑄西鄰借桔槔南村買黃
犢北村賣寶刀嗟爾倪生本詩豪惟知痛飲讀離騷如
何襍襪洗雙足犁鋤之具手自操倪生答之良有以童
僕忠良古無幾汗萊重使遭侵漁不如棄向黃河水唐
港耕人名亦佳旣耕還讀原由已但求了得官家糧歲
時父子皆歡喜君不見陶潛田舍有真趣飲酒篇篇見

佳句尙嫌懶惰不躬耕柔腸寫在閒情賦諸葛躬耕頗
不凡多事他年答三顧畢生漢賊終兩立豈若南陽守
康瓠吁嗟乎倪生之先人功高未得圖麒麟有子儒雅
復苦貧韜鈴詞賦兩俱錯對君且說田家樂

快哉行

江東自從大麥黃乾風吹塵十丈強高田低田徧龜圻
焦土何處容鍼秧我行江北耳輿論旱魃安得災滁陽
太守憂民若赤子斯民戴守如耶孃快哉五月十三雨
堪紀城隍廟中鼓聲起步禱剛傳太守來香煙未斷翻
盆似倒捲黃河定是誰知是龍池老龍子六鄉三市何

所聞歌聲笑聲雨聲裏颯沓渾如萬馬至
萑葦麼麼磨盡短氣霹靂娛心絲竹音
電光悅眼泥金字盈溢漂流濠下魚
潭沄浮動龍興寺

時寓此寺

客子提壺問酒家
詞人攬

筆勞詩記霑足滂沱自此州橫被迷溝
與頓邱錢鏞勻泥古塍復桔槔洩水方塘
收埽括倉箱待子粒抖擻箕笠驅黃牛老
農相顧得有此感格豈不由仁侯君不見
太守謝壇民擁足相賀吾侯今日可食肉

同心念一老歌

老夫怕熱抱佛腳龍興古殿命所託清
晨蹙入復對誰彌盧尊者睂如昨金像
還疑汗在頰那有提壺分半勺

沈眠只願夢化魚，卻思魚亦匪克樂。元都道士偶相識，見我眼赤貽我藥。藥封不動，休致疑生怯。錯火添燻灼，紫薇泉水清見底。汪友西瓜難再索，自憐肉熱不可瘳。安得層冰供大嚼，忽聞童子叩殿門。恐是熱客驚我魂，入門乃是黃魯直。遣童挈榼提清尊，頗恠無酒氣。小榼未啟，香氣氤氳。榼中宛轉亳州之蘋果，尊中湛湛泉出江左惠山源。把瓢飲水毛欲立，蘋果漫喫核僅存。豈獨二物性所愛，日來暑病都除根。問之何由得有此，童子喘定始細論。嗟乎世人贈送踴躍足豪富，三韓氣息尤所奔。獨君父子同心念一老，使我震動感激聲還吞。

後快哉行

今年竹醉之日得好雨原田水深非小補潺潺瀲瀲流
浹旬情農遲種仍乾土嗚呼皇天亦難作儵堯儵湯爲
怨府北風之圖不我涼雲漢之詩亦何苦或言龍挂三
日前火雲騎日殊茫然或言屬邑有大雨來者亦復云
虛傳或言四鄉雨不絕太守疑信終憂煎寸誠積禱見
靈貺祝版往祭豐山巔歸來割胙貽客子仲叔猪肝何
足比誰知飲福猶未終電掣雷轟二百里分明舊雨不
如今舊雨三尺今半咫舊雨當時已足奇今雨回天良
有以君不見大河南來十三盜礮礮項領獍豸貌八盜

八馬皆肥膘一朝穿鼻擒之到刀脊猶殷乂湖血箭鋒
忽析仙居道觀者傾城如堵牆駢肩疊跡惟知笑惟時
太守獨沈思城中巢穴誰得知矧有兩梟猶未得寧無
三窟當窮治大之城池小府庫豈獨編戶關安危弘羊
不烹天不雨何況此物容畱遺果然一鞠得賊首市中
童謠天上口娶婦如花親串羞成家伏莽交遊醜明堂
懸鏡光熊熊賊智焉能廋某某向者兇徒皆虎豹此時
囚繫同猪狗快哉真賊盡得株累寬廓清不獨滁陽安
是日密雲方布濩列缺吐火豐隆謹金蛇出沒銀箭攢
絕竒雨點大如盤東塘放溜西堰滿古井亦復生波瀾

當知從此直至秋成不復憂雨少除民之害天心歡噫
嘻彼焚巫覡誠何干

觀棋行

倪生周生居比屋秋涼賭酒憑棋局布子漫多勝負分
倪生黑子彌方幅周生暗數色沮喪細語微聞五十六
安排今夕周作東溪蟹香醪入吾腹俄頃局中忽大噪
喜者卻驚愁者笑地覆天翻一著差可憐官著還難料
老夫覩此惆悵不能餐棋乎棋乎何足歎

歌答宗無齊兼爲別

先生好客異鄭莊揮斥萬彙歸文章先生工詩輕李賀

鬼語躩踞大音破先生觀潮詩獨奇潮打空城事可知
與予相識自今年相知卻在義熙前尊君齒與予相若
不敢爾汝恣戲謔老識無雙襟復虛方冊蠅頭書拙作
是父是子世所稀一日不見如朝饑百日幾日不酒我
不但推食還解衣江陰學宮天下無參天樹下海鶴呼
客子淹留良有以太宗小宗一知己身到黃山夢到此
椰冠道人歌爲張子虞出作

道人前年行萬里探奇去飲珠江水歸來一物無所攜
獨得椰冠大如指椰冠華首日相親人見椰冠識道人
翻恨此冠人易識不教簪導入風塵道人吟詩追古調

方戴此冠收眾妙道人彈琴求正聲方戴此冠遊太清
道人飲酒復擊劔此冠嶽嶽爭光燄我愛道人真忘機
海鷗石虎無是非我愛道人真急友長向龍興寺中走
八公山南多第宅道人不作淮南客淮陰市上多少年
道人不賦絕交篇借問道人何砥礪所期不負柳冠意
莫言草木無心肝會見丹青閱人世嗟余嘗少冠竹皮
近來老秃無一絲柳冠何似無冠醜惟有頭上青天知
送鄭肯厓先生北行時聽王郎琵琶口占亦名琵琶行
昔年來往過江州屢向琵琶亭上游香山老去琵琶朽
亭前之水空悠悠只今送客冶城下重聽琵琶催上馬

四十年來酒一杯頭白臨風淚如瀉

揚州春

庚戌十二月
客揚州作

揚州春迎春自東郭盡道今年官作春先期三日行催
索積雪泥深一尺餘倡婦挾瑟乘肩輿紅妝半露疏簾
裏不知顏色還何如春日諸官宴綵幄此曹勸酒須唱
曲請君但聽曲莫聽六街三市哭

揚州客

揚州客出門殊意氣匣有無絃琴知音期不至嗟爾客
來去無計故人賴有韓張良

釋恭也

層冰窟裏露熱腸鯉

魚尺半亦尋常魚中素書不可忘

揚州雪

揚州雪積如山滿城乞兒皆凍死商人亦覺今年寒客
子衣單資用竭偏到揚州來看雪雪下白簔簔入釜不
可炊江南亦有雪江北來何爲

揚州草

揚州草不青復不黃百錢買一束難熱釜中湯有米之
家亦無飯客子聞之仰天歎將薪比桂桂不如琪花瑤
草誠有諸

揚州炭

揚州炭炭有汁渣無多汁滴瀝故人憐老翁買送風雪

中呼兒然薪急煎炭炭未乾時薪已斷感君意氣支體
溫炭乾炭涇何足云

五日歌賦謝顏衡山

顏生復聖之子孫簞瓢陋巷家風存枉訪眞江歲丁巳
俄逢重五觴茶村入門先喜髣几潔衛足之葵當戶翻
廟後岍茶色正白嶺南黃熟香初溫小史雍容肌玉雪
次第開尊清且冽宜窰妙杯好安排方物珍羞忍羅列
金盤銀匕置當中丹砂九轉蒲九節從來角黍甚尋常
亦復光華風味別是日天氣仍清和興劇無勞觴政苛
花去石榴離豔品壁無符呪惹么魔乾坤子午在何處

疏狂且得衰順醜白髮雙垂不到耳陽關三疊猶能歌
未申時至觴可已援而止之而且止因憶主人大父昔
同遊名士如林樂無比此日秦淮燈船泥殺人朝卧平
康夕在水鴛鴦巧作百花香鯨飲常眠三日起樂極悲
來難具陳人生何苦要酸辛吞聲大笑不復道主人娛
客情更親卓如老人元好事收藏書畫多先民發篋共
賞賞且酌姓名一半記不真最者陳白董思袁小宋比
楊龍米老碑刻還有神碑載君家平原尸解事神仙自
合歸忠臣吁嗟今日樂誠樂世閒萬事無不新賜也貨
殖深藏不可見誰料顏氏之子翻畱賓

樵青歌爲黃仙裳作

當時同學十數人兩人引頸先朝露一人萬里足重繭
一人入海隨煙霧三人滅跡逃空門四人牆東長閉戶
一人賣藥不二價一人佯狂以自污黃生計畫無復之
門前便是青山路昆吾寶劍千金直改鑄腰鎌應有數
黃生終日無蹤跡上山清晨下山暮有時昏黑猶在山
痛哭身當猛虎步不知爲樵定何意黃生安肯言其故
但聞有一海靈樵時時偷訪鍾山樹
一杯嘆

老夫愛酒兼愛杯生平羅致逾百枚于闐之玉不可得

駭雞之犀何從來哥窑定窑談不易醉紅雞缸走權貴
匠手爭誇天寶齋不貪豈識金銀氣我所好者祇是宣
德成化嘉靖萬歷窑溫潤銷魂可人意啟禎年間眼稍
怨不論歲月論款致說在壬戌之小春延陵詞傑作主
人一杯宛轉絕可喜酌酒半兩剛停勻其下覆手素無
文回青花葉中續紛小兒之拳孰大小只如季雅遺三
分老夫量在下中耳飲此十杯竟醉矣因向主人乞此
杯欣然首肯情何美受杯輕籠窄袖裏准擬明朝獨酌
有妙理誰防此意天已知旋將一石橫路歧醉歸昏黑
誤踏石一跌非同少壯時觀者驚嗟老夫坐老夫未損

杯已破歸來恨恨意不平邊雪亭中枕書卧秀人來勸
老夫著跌非等閑但不傷殘卽可賀何故翻爲小物愁
達者如斯無乃過我言君不知我心我豈不見俗兒酒
器直萬金列樹編識分古今我嘗鄙之不若禽我所悲
今英雄不得志虎嘯鷹揚流水逝一卮弄酒何關天亦
復批之教破碎坐使吟詩作賦興索然眼見斯文從此
廢吁嗟乎嘗聞稽叔夜徐景山酒杯酒鎗亦已傳誰之
不如矧二子一杯到手便不堅又聞舒州杓力士錯李
白與之同死生自也愛杯至於此豈獨老子獨無情
賣船行爲施愚山作

嘻人生寧可無宅住妻子不可無船狎煙水我昔常思
有一船放浪江湖誦書史名山可遊解纜就伊人宛在
舉帆指放翁長在三泖聞少伯不離五湖裏有時風流
效陶峴歌船酒船更銜尾將船垂釣七里灘將船弔古
西臺淚吁嗟乎無船妄想過一生有船不賣可知矣故
人愚山我同志久宦一船豈謂侈矧君博雅負才情船
中汨汨吟聲起叩須正欲往從之唱和船中風日美何
故牽船急求賣無船倍昔有船喜短簫橫笛兩茫茫木
蘭沙棠徒爾爾愚山一笑君言然以君作我亦賣船
典裘歌爲佺廬中丞賦

中丞才比劉華容江陵江夏剛過中中丞詩似李長沙
公安竟陵偏一家中丞操逼鄭襄陽調劑應山與孝昌
秉鉞撫吳二年矣官清但飲吳江水夏葛冬裘聊復然
典裘犒士豈問傳豫章之材根柢大如蛟有壑龍有淵
中丞家世吾所悉碩德巍科何鳥奕名父當年吾楚英
文噪壇坫東南傾惟余矣作亦從衡二子曾訂千秋盟
彼時中丞稱早慧一別年深今鼎貴魏我萍蓬成匪民
多君霄漢存高義茂苑金陵若里閭知君美政不勝書
典裘曠舉同國僑偶然濟人以乘輿孟軻議論頗蛇足
輿人作誦茲羸餘孔禰之交吾白首稍健趨風必東走

今朝飽飯且作歌重感中丞懷老友

適承繼粟

解裘推食意

誰多誦義維均兩不磨我有羊裘常質酒不知誰作典

裘歌

初聞鐙船鼓吹歌

丁亥四月十七日秦淮舟中作

一聲著人如夢中雙槌再下耳乍聾三下四下管絃沸

鐙船鼓聲天上至居然列坐倚船舷驚指遙看相詫異

鼓聲漸逼船漸近亦解迴環左右戲急攢冷點槌猶澀

春雷坎坎初驚蟄吹彈節鼓鼓倔強中有閉聲闌不入

吁嗟此時聽鼓止聽鳴誰能打搯聲裏情誰能眼底求

精妙乍許胸中見太平太平久遠知者稀萬歷年閉闈

而知九州富庶無旌麾揚州之域尤稀奇誰致此者帝
軒羲下有江陵張太師江陵初年執國政樂事無多廟
謨競爾時秦淮一條水伐鼓吹笙猶未盛江陵此日富
強成聖人宮中奏雲門後來宰相皆福人普天物力東
南傾豪奢橫溢散向水此水不須重過秦王家謝家侈
紈袴湖海遊人鬪詞賦廣陵女兒絕可憐新安金帛誰
知數舊都冠蓋例無事朝與花朝暮酒暮水嬉不待二
月半袷服新妝桃葉渡高樓夾水對排窗捲起珠簾人
面素騰騰便有鼓音來燈船到處游船開燭籠但恨天
難夜赤鳳從教晝不回皇天此時亦可哀龜年協律生

奇材善和坊接平康街弄兒狎客多渠魁船中百寶梁
溪酒膽大心雄選鋒手蘇州簫管虎邱腔太倉絃索昆
山口鎮江染紅製瓔珞廿碗珠燈懸一角當前置鼓大
如筐黃金釘鉸來淮陽此聲一驩眾聲集不獨火中聞
霹靂風雨叢中百鳥鳴旌旗隊裏將軍立熬波煮火火
更然積響沈舟舟未溼可憐如此已快意未到端陽百
分一記我來時卯與辰其時海內久風塵石榴花發照
溪津友生置酒我作賓下船少遲渡口塞踏人肩背人
怒噴燈光鼓吹河河徧銜尾蟠旋成一串蔽虧果覺星
河覆演弄早使魚龍顛眾人洶洶我靜賞初奏此時差

可辯須臾光響相糾結惟聞森森沈沈直上翻雲漢東
船西舫更交加下視何由覩寸瀾偶然閃儵透水處如
金在鎔風掣電樓樓堂客舩舩妓近不聞聲遠察面鳴
乎此時鐙船更難動但坐飽食揮槌調絲按孔相凌亂
侯家別攜清商部那得於中聞唱歎復有劣鼓與劣吹
就中藏拙誰能見爆竹聲低煙霧濃暫借香風解霑汗
露零雨下不得退樂極生悲真可厭酒醒忽迷此何地
魂銷略記伊堪戀直至明朝日亭午船鬆卻退人相羨
歸來沈眠須竟日流鶯啼破河陽戰此後遊人數日稀
清淮十里桃花片記得坐中客能說王穉登穉登搥鼓

湘蘭舞賞音擊節屠長卿後來好事潘景升晚節猶數
茅止生絕藝於今誰作主李小大歌張卯舞當時惆悵
說於今忍見於今又說古年復年來事可歎鐙船伐鼓
鼓不歡辛壬之際大饑疫惟見鳳陵烽火照見秦淮白
骨橫青灘桃葉何須怨寂寞天子孤立在長安吾聞是
時宰相薛復周黃金至厚封疆仇公卿濟濟咸一德坐
令戰鼓逼龍樓甲申三月鼓遂破斷管殘絲復誰和半
閒堂裏起笙歌平章舟上稱朝賀試問當時雷海青階
下池頭還幾箇新劇惟傳燕子箋殺人有暇上遊船行
人何必近前聽荼毒鼓中無性命同時阿誰伎畜爾惟

有劉黃高左五侯耳君不見師延靡靡濮上水未若玉
樹後庭美賞音何人丞相語相對掀髯復切齒一撥絃
中半壁亾一棒鼓中萬人死鼓急絃驚曲不長兩年歇
絕隨漁陽有容徒憐橋下水無人不斷渡邊腸及此相
看眞分外何許藏舟一舟在拂塵捍撥初光輝奮搥揚
袖藍縷衣不鐙漫乘夕波出無伴知從何處歸爭新誇
奇各有故君看西風桃李枝西風一枝眾稱異東風萬
樹空爾爲入耳悲歡難具說醉裏分明寸心熱嗚呼漢
代金仙唐舞馬此事千年無有者興亾不入心手閒然
後聲音如雨下探湯搥鼓疾藜刺應有心肝礙胸次餘

音漠漠攬飛絮
鐙船鐙船過橋去
過橋去傷鼓聲長歌
短歌歌當成隴西
李賀抽身死舉杯相屬樊川生
此生流落江南久
曾聽當時煞尾聲
又聽今朝第一聲

悲哉行贈余子生生

悲哉余生去蜀萬里無以爲家而投老乎東海之濱
悲哉余生不悲其身之無家而悲其先世之無墳
蓋嘗泣血負土辛苦萬狀而後得以掩夫纍纍之骸
暴露而縱橫悲哉余生蜀中多虎虎之力足以守墓
奈何虎去而來此不義之人彼楊璉真伽輩方塞乎天地
乘車戴笠者皆是曾六陵之不恤而奚有夫金吾之家世司馬之

功名悲哉余生遭世之亂不在於刀兵水火而在於斯人之喜怒哀樂皆失其正而倒用其情其得之則喜失之則悲者惟勢與利而漠然於吾君親悲哉余生所以悲不可已而彼蚩蚩者顧反悲生之窮老而無家也豈不重爲生所悲哉悲哉余生

詩二

潛江甘鵬雲校

變雅堂遺集

詩三

黃岡杜濬

五言律詩

聞子規

四月三之日子規驚夢魂天高吾不問春去汝何言口
血腥花氣關河阻劍門此方多挾彈未可恃君恩

園霧

霧合園何向茫茫江海心秋蟲啼不徹大樹若爲沈且
賺昏鴉集徐看赤日臨天光遲戶牖無事客愁深

螟蠶何多族滔滔向此中自矜眉睫審不信顧瞻同天

地如藏拙江河倘諱窮誰將寥廓意此際問高鴻

答緯之

宵長行復盡獨此歎難休不耐忙中慘惟堪靜處愁月
明垂淚夜風急斷腸秋魂魄誰能致生涯非所謀

逢子桓

別後人羣改相逢鬢髮殊殘生轉不易且復立斯須道
喪畱朋友心恢亦丈夫有懷談未盡春信到荒蕪

畱別張樞下

交子不能別翻思未晤前輕裘何止共畫舫不孤牽世
路愁知己君親策壯年敢辭南北限秋月或同圓

贈陳淡立侍御

馬周千載遇一旦獨輸君豸竝宮衣賜花同繡斧分帝
稱真御史客揖大將軍卻憶江城夜清尊細論文
贈張瑤星錦衣

張仲長安邸惟余接膝頻除書無長物遺像有嚴親頗
續文昌句無慚孝友人明君如賜錦宮樣別詞臣

次韻答陳伯倫惜別

是客皆愁夜惟余更負秋炎寒三月變醉醒一身浮孺
子空畱榻仙人不好樓日歸天闕隱短褐敢深憂

聞黃石齋先生賜環同諸友用魂字

穀城山下石終許作雲根讀易知難死投沙喜尙存碧
無今日血忠有舊時魂肯學吹鑿陋畱連黃閣尊

次團江

下馬團江許烏林舊戰場楚弓沙月白吳壘戍雲黃鑑
影涵天遠襟流東地長江聲疑有恨如欲訴興亡

贈沈彤菴大行

并序

午之役彤菴先生分校北闈視禮記房分卷時過詢同
考黃澹巖中翰曰雅聞吾房有貴鄉杜于皇劉濟甫不
得之爲失士但戰場五色未免目迷公於二君里門同
耐必知其文之梗概幸以教我澹巖具言劉文密麗近

六朝余文踈秀近漢宋彤菴唯唯隨得一卷亟示澹巖
曰是劉生無疑矣惟極力求余卷彷彿澹巖所云者竟
不可得閱卷且竣愀然不樂至欲請澹巖至其房爲之
代搜澹巖以嫌辭及填榜知余竟不得撒棘卽在顧極
其慰藉且託諸相知爲道惓惓蓋不知余此番闈中牘
乃稍貶道不敢甚任本色旣余索得落卷則又囿評可
觀但不入彀耳乃知莫非命也然先生汲汲之意則可
感矣於其南還也作詩送之

好士至惆悵知君誠有餘萬言求董賈一哭蹇包胥不

直仍遭黜

余已卯以結語
侵樞相置副額

難從在下居且無師弟刺造

化意何如

夜坐方密之署齋論詩有懷楊龍友范仲閩李舒章時

余將別去

李余未交

卮酒菊花親與君懷故人詞場成聚訟草莽有孤臣黔
蜀波瀾老雲閒體製臻玉堂燈影散況憶別離身

客京師數月朝夕密邇惟錢漁叟錢與朱越流同寓至
是將散去總括情事得詩五首與錢竝及朱以爲笑樂
至詩中曲折惟余三人知之耳

二子長安邸狂夫日日過見書嘗唾罵遇酒卽高歌怨
別一朝雨相知萬頃波君歸先掃榻有客到吟哦

屢有西山約偏爲苦雨淹風塵甘自遠山翠亦難沾
孰隨鞭鐙愁能壓帽簷途先窮到酒白眼看青帘

此地本無女君言訪得之倒衣迎小玉催火照西施入
座傷借老當時讓頗奇戲畱詩柄在朱子定能知

悔延西晉客悟犯執金吾饁餽童子奔波及老夫書
知誰視草道欲我乘桴君亦何爲爾朝朝叩閣呼

交道看僮僕迎余有好顏頻來君或出款坐待君還酒
茗能私我琴書不上關畱詩遺姓字余尙半癡頑

馮沛祖以五經卷見貽報之以詩

儒宗推漢代各以一經鳴華國惟馮子專家笑董生萬

言珠璧合午夜日星明讀罷余何事長歌天馬行

贈周穎侯穎侯再約同舟南歸余皆以他羈不果踐

不知君早達落落復悠悠下筆黃公望含情顧虎頭計
誠宜共返身未肯東流益嘆前賢事相同不但舟

閣穎侯詩

穎侯會
謫邊幕

譽子詩中畫人閒語盡然挑燈嚴可否把筆準前賢高
適營州幕王維輞水川看君未三十佳句已堪傳

蜀中劉念先死三年矣在時寓白門每當園中海棠盛
開輒置酒請余賞之諾賦一詩未踐也津門同寓友有
習念先者爲道其生平及其令上海開河便民狀怛然

賦此報念先地下焉

地下劉公幹三年苦別離不成天馬賦竟負海棠詩
寧爲娉婷死如酬國士知河流今利賴何故謗君奇

過滄洲大風

風威忽如此北馬詎無憑看水吹成路搏沙強作冰
不堪思猛士夫豈發金滕笑傲何繇得滄洲未敢凌

梨花集再用冰字

前過梨花集淒然雪片增頭鬢同白草腔血作紅冰
驢臥從人策山荒聽鬼鷹行行驚凍火勞矣店家燈

早寒三用冰字

讀孟貞詩題其卷右

雙眼人嫌白孤衷自不狂一逢邗北地卽見孟襄陽破
硯吟甘苦疎燈句短長願言迷路客消息問漁郎

吾交有數子邗昉是詩人離亂儔幾失饑寒句轉新似
君操寸管何處得織塵讀罷疑前代流傳出避秦

生日阮仙有作依韻和答

山巷一日息幽獨賀吾生出世才難倚知心友更明蛟
龍疲舊壑鶯燕語新庚不愛少微象何貪處士名

生日依韻和答歐陽次公兼避周農父方直之未至
有生名此日得爾伴孤遊共醉俱忘物惟閒可放愁柳

條青恰至梅蕊白微畱底事龍眠客相思庭戶悠
孔雀菴初度又申置酒與治剝公過談
襖被依僧舍殘梅弄曉晴百年原瞬息一刻亦平生坐
醉侯芭酒來歡支許盟不知明日事端的覺身輕

夕警

一刻卽三警鄰雞幸已鳴愁深逃萬死睡足賀殘生筆
爲招魂禿巾從漉酒傾形骸還浪得未覺不宜輕
送賀文凱歸竟陵

竟陵今欲問門館夙相親常夢兩湖水君來卽故人歸
舟投漢廣佳句出風塵想見端居日思余若比鄰

送歐陽次公歸潛江

師友復昆弟與君交好多來同白門宿去和紫芝歌春
雨生庭草晴江爛釣蓑杜陵詩滿目商榷更如何

聽公允琴

抱琴仍夏夜絃指近秋邊幽咽吳宮草深爲楚水煙客
塵隨響落孤調與誰傳庭樹光零露初更月未圓
寂歷空亭上琴心宜遠聞絲桐如有識身世復何云蟲
響於斯止樵歌向爾分賞音堪擬似片月伴孤雲
牙期難再得斯好不會無是器皆堪和如君恐太孤遠
松微有籟獨雁任長呼於此徒然悟高閑未到吾

彈罷聞君歎身心亦未閒官猶羈小草意止在高山素
手自明滅幽蹤隨往還如何隱居者有曲憶人閒

雨後集合露堂言別論文分得畱字

桐柘交陰處能爲雨後秋過從含別緒談笑隔清流古
意淮南葉他鄉劍外州十年對知己今日自言畱

次日再用畱字

屈指朱明盡離心怯素秋榻懸堪再下髡醉互相畱竹
柏揮人影舟航具石頭繫情他日咏西北有高樓

又用嵩少然字

斗酒極知薄故人不謂然談侵深夜月坐入素秋天騷

怨終歸楚高歌往和燕後君商古學離別莫經年

又用德人單字

抗言晨夕地論別自然難河漢披襟淨江雲覺夢單有
書同載穩勿藥異鄉安顧我仍飄泊移家寄釣竿

答金五鍾卽和來韻

先一日同訪大
椿歸聽鼓琴

何限愁霖曲方晴意更遲新知兼訪樹舊業得稱詩長
嘯貽中散孤行遇子期夜來彈絕妙琴韻入秋思

懷山堂論詩

唐詩三變後吾意止中唐過此風斯下其他運可傷含
悲生石闕積憤滿書倉閒氣惟忠信西臺發古香

宋詩
以謝

翺爲第一
以後無詩

試杖戲作

今朝初試杖杖國是何年竹性同麋鹿

麋鹿竹杖

花時拜杜

鵲甘隨東閣履不傍繞朝鞭甚覺爲龍易何須慕稚川

偶然小飲和王歙州

一蔬會未設村酒復中之豈意飄零況能來絕妙詞驪

珠兄弟得馬角古今遲八月如三伏清風吉甫知

李匡侯載酒過草堂

吾道長妨笑斯辰邁一歡青尊從白首夜火變春盤

元夕

後二日
衰鳳談何易猶龍世所難好詞還絕妙只作早梅

看

早春同匡侯孝威飲劉氏園

再至仍霑醉悠悠十載期陰晴分柳態前後總花時雲
壑憐真隱山莊揀畫師老蒼俱在座來者慎吟詩
花時貰緼袍

斷雪清明後雖寒尙不深有花方暖眼無褐詎哀吟可
愛杯中物生憎肘後襟衰年須快意妻子豈知心

短衣仍楚製入市引軒渠懷玉人誰信尋芳錦不如真
愁聞杜宇切莫駭爰居萬事歡難並溫風草丈餘

故人有孝子野寺作閒僧花徑堅相約壺殮媿不能若

無袍何典空有興堪乘祖禡繁枝下支公見未曾

我袍雖百結亦抵鷓鴣裘痛減千金價言消萬古愁不堪邀伴侶兼得省賡酬鐵磬詩名者他年造酒樓坐願與治新齋

予汝隔城中園成若與同看花移耳目穿石到鴻濛熱客嘲難免良辰撰不窮枕書眠竟日先試北窗風

赤日難歸去清風故送涼也竹睡餘窺散帙飯畢繞迴廊

蘭葉何其久橙花且自香從來蔣生逕大抵屬求羊

之子寒松齋會今漫閉關不能如曠野聊取代深山避世牆南北懷人鶴往還繫池何地可入耳要潺湲

磅礪雖終日纏絲未一尊再來應載酒相送豈畱髡水
國滄沈陸山齋舫製軒主人如酌我此地最堪論

自迷漁父路久罷應門期新築容來往殘生有別離余
能眈晏坐君自妙臨池魏晉門前事高人知不知

何處齊吾意爲園不起樓庶幾停遠望不至引深愁南
郭風傳磬西山蕨滿甌誰家方晝錦目笑此林邱

草堂毋浪擲稽古亦其時秋晚燈方靜春深日正遲休
看庾信賦當咏左思詩獨擅惟堪薄能令作者垂

林茂之偕家兄方朔小飲借石齋

未能營利達不復事樵漁閉戶仍求友清談閒讀書溪

鱗隨漲得簾影漾風徐此際一杯酒窮愁忽晏如

夏鶯

長日破吾寂絕無他鳥啼微風吹百轉濃綠映深棲過
樹身初現窺簾雨乍低莊周今有夢非復蝶能迷

午日書思禹歷齋中聽胡安士彈琴和韻二首

廣廈薰風至披襟一爽然相將歌楚些復此叩商絃志
潔先爲地聲希卽是天自從分手後洗耳只今年

何必尋師授孤桐一片心若論今日事湘水是知音干
里家安在平生感獨深老夫紅兩頰曲罷更高吟

芍藥十首

天然三婦豔，香至動湘裙。色皎同肌雪，香柔似鬢雲。中
心尤可好，俊味許誰分。芍藥和味淇上如相送，魂銷賴酒醺。

復感鄰翁贈，昭容紫袖垂。入瓶俱宛在，錫號總將離。不
覺朱顏闕，彌增素質奇。同車休見妬，一任老夫爲。

主人閑不出，花亦若爲容。閉戶辭塵務，鉤簾玩化工。紫
欺紅躑躅，白學醉芙蓉。草木多姿態，吾其萬事慵。

新水發新香，水深花命長。風流如再整，面目若重光。尙
倚傾城笑，休驚墜馬妝。溫柔能悟道，卽是白雲鄉。

客舍無三畝，焉能傲故林。都將羣卉豔，直付一瓶深。折
贈隨丹素。白者爲公調，尊五。贈紅者爲隣翁贈。衰榮自古今，悠悠長抱膝。

相對暢孤吟

復置一尊酒無多賸此亭冶容嬌閨夏老眼拭初醒在
昔思爲圃於今正翫瓶

余有無花且玩瓶句尊
五送花云可免瓶玩

多情爲

草木相謔亦忘形

讀書燈黯淡炳燭照華滋寂畫明真色深宵發幻姿寫
窗香在影佐酒月分卮滅去愁盈尺何妨就枕遲

愁眼對娟娟時時復燦然忽驚顛顛色不似妙英年漫
灑臨風涕猶堪一日憐殷勤頻換水爲我強畱連

膽瓶花不斷庚續賴孫翁別出幽奇種兼留澹豔風蓮
房含粉白秋水襯霞紅一朵嬌無匹臺心亦已空

右入
首成

閣筆矣公調又贈一枝花一朵淡
紅淺白色頗稀見因復有此詩

再出花彌大初驚是牡丹小喬呼作姊樊素喚爲蠻承

露杯無恙優曇鉢未殘生成兼作者彼此各知難

次日公調

又贈一枝花一朵
顏色如昨而較大

送龔孝升先生北行

天末衰遲眼十年望故人相逢不長聚後會復何辰獨

困方知拙難言始是貧良時多好語忍淚盼行塵

獨行猶闕別況復舉家行只恐絲綸貴因同帶礪盟青

霜催短褐白首望燕京道路期君老何當賦北征

陰德于公大今年再弄璋雙瞳剪秋水一笑識文昌已

卜功名盛先虞道路長老夫他日見應問客何方
康濟誰能盡功成退步寬鹽梅畱澹味霖雨慎波瀾毫
素深心託榮華道眼觀古來光史冊知止最爲難
離鄉四十載親串隔千峯難得夢中見偏於意外逢行
藏俱寂寞壯老各形容此會須常記同聽虎阜鐘
看苦戲

何代傳歌譜今宵誤酒盃心傷情理絕事急鬼神來蠟
淚寧知苦雞聲莫漫催吾生不如戲垂老未甘回
孝章至自吳門過訪雞鳴山寺登閣遠眺

幽徑山中邈同尋遲子選息身還有地極目止無家寒

言三
三
閔干峯雨烟消一陣鴉舞幡風更急往事問玄沙
秋日訪眉照上人用孟浩然義公房韻

客愁何所託戀戀此幽林眺聽秋聲滿淹畱細雨深吟
情依淨域兵氣自窮陰江外逢蒼雪於今廿載心

乙巳清明日飲吳漢槎海棠下

芳徑過新雨海棠花半闌主人畱客醉童子得魚同香
細風飄幕絲繁影照杯佳辰如此度不負杖藜來

贈魏子存

分袂從隋苑尋盟到武塘如何江上客不返漢之陽計
拙違知己途窮入大荒故人憐屈宋此地卽三湘

百端卽可置大事逼衰遲不見瀧岡表徒遭薦福碑倦
遊焉敢息塵跡豈能辭一笑相逢後中心依舊悲

真栖攜錢過草堂酌我時余自滁陽返真栖自武昌復
來

破日秋光好荒年酒債平相逢沽一斗亦足慰殘生我
恨梅花落君悲漢水清鄉愁何必話鐵笛作邊聲
花木菴同蒲道人啜茗

苦茗生平好逢師此共斟綠江無盡意白首有同心山
月照逾淡松風吹使深黃鸝知飲愜枝上送佳音

寺樓雨中同亦史翼微來鶴桐初作

與客上高樓蕭蕭海雨稠甲兵全未洗行李又須畱烟
合疑無樹山空但有秋此時同抱恨不待話離憂

古樹

爲四明邱氏作李杲堂記云家亦有苦棟樹與邱松柏相望

聞道三株樹崢嶸古至今松知秦曆短柏感漢恩深用
盡風霜力難移草木心孤撐休抱恨苦棟亦成陰

十二月十五夜至瓜渚宿魏氏榮露堂與其喬梓卽席
共賦

獨樹今爲客來敲月下門寒天猶逆旅落葉不歸根冰
雪春天盡江山戰後存銜杯慚已老未敢議酬恩
送吳舫翁遊黃山

幾蠟靈山屐蹉跎四十秋丹臺初日湧黃海白雲稠猿
鳥看人賤漁樵入界幽君歸先報我猶擬作菟裘

哭李鄴仙

事後論人品無如李鄴仙畱身惟賣藥有子只耕田學

道知原夙

李著有夙知錄

安貧力更堅白雲山下路誰表少微

阡

送文止峯歸楚兼祝初度

不是君來別余幾忘故鄉一時心共去千里夢相將賓
雁迎江棹梅花放草堂向南歌郢雪亦足代爲觴

戊申正月十七日逢初度雪中子婿小酌桐初後至同

用花字

賤老成風俗驚心覽鬢華春城燈未遠鄰舍酒還賒已

禿丁年節空飛北海花自慚非樂令洗馬到貧家

生日羽南送魚酒有詩戲答

寂寞辰誰記來公篤老盟雙魚一尊酒五字百年情意

氣消霜鬢風花似錦城倦遊殊落落吾道豈馮生

來詩有

舍飽魚之語
故答以馮生

已酉仲夏天章忽自淮陰遠訪薙髮而僧喜餘有感成

詩

怪有高僧訪登堂是故人三年添夢幻一笑釋冤親命

薄翻聞道情多轉離塵先公方屬望出世且逡巡

清和八日立夏同惟度南郊看芍藥卽事

出郭飛揚意登樓悵望人伊其爲暮雨我自惜歸春時

序原逢舊豪華頗笑新遙憐惠安圃今日幾蹄輪

惠安伯園

內芍藥

萬本

送魏惟度偕吳星若西湖結夏

清和將盡月簡易東遊裝風在湖心寺知君此去涼眼

中西子秀夢裏武夷蒼況復攜詩友幽吟日幾章

春日獨酌有懷素園

啟戶東風入晴光照眼新江梅寒意盡塞雁別情眞此

地無湘草何時見
郢春故人同作客
把酒自心親

仲春肯厓再往草堂
小酌承示佳篇依韻二首

不辦君王事
丁年負黑頭
予年三十四自廢棄兩貢一官
感翁來客舍

勸我上歸舟
偏宕孔文舉
高明陳太邱
終須同洛社
未

可各滄洲

為喜鄉相見
因畱客與俱
御風迎列子
列子居鄭國故云
逐日

笑夸夫巴酒
濃堪酌劉天
老畏呼
天姓劉雖戲談見正史
未應愁

拇戰不過倒雙壺
金陵巴氏酒最佳

舟發武康

雪後歸舟重開
颿發武康湖山
畱粉繪裝笠本
南裝賞

罷愁無米吟殘幸有觴等閒齊萬物調笑此空囊

曉發過湖州有懷園次

蒲帆乘曉發舟子報新春風末有南雁雪中無白人吟
將行色起寒逼濁醪醕醉眼窺城郭題書恨少因

癸丑中秋前一日過蘇嶺席上爲五舅父壽

倦客行投止叨逢綺席豐他鄉偏我老母弟獨存翁宛
作家人集多慚宅相同舅甥如父子彷彿二疏風

同有郟公好

先外祖
喜觀劇

秋宵共選聲彌知尊舅健坐徹碧

天明癡疥曾何患滄桑也不驚橋門畱曠典稽古尙期

榮

此地君山在居然似故鄉中秋將滿月八十以前觴佳

句賡奚賈

蘇嶺先有詩

香醪問杜康

此地有杜康宅

爲歡逢永夕白

首亦應蒼

別後良多故相逢且默然如甥非俊物似舅貴長年老

泥春申浦閒評陸子泉

惠山別泉

還丹寧有訣無累卽眞仙

馬節婦

死所斯人得生涯若輩慚雉經身是女苟合性非男大

罵存言外貞魂渺劍鐔自今傳節烈須問作家堪

馬伯和宅海棠分得醒字

把酒來花下看山坐水亭鬢毛疏更白春色曉多青麗

蕊關心賞妍枝議膽瓶一酣拚竟日三月不宜醒
伯和落一齒有詩爲余誦之復用其才字

齒落聞新句癡蟲試爾才無多妨肉食全不礙啣杯老
怯邊風入人窺笑口開何妨杜陵叟車輔半推頰
雨中再酌伯和齋

細雨春泥薄支筇問索居話閒尊酒至何處管絃徐池
水行將起籬花漸欲舒頻來慚款洽挈榼意何如

僧舍

精舍幽無比春暉入戶斜坐看天上竹閒掃夢中花只
合聽歌鳥無勞轉法華淨踪貪佛處一歲一天涯

送孟貞

一笑遊垂橐面顏如此蒼送君今日別入我楚天涼歸
夢附千里來書隨數行黃州經過地未必到三湘
送萬年少返吳門兼訊姜三如須時余亦將于役
一聚各有適不須獨送君偶然罷微酒相與惜離羣京
口見圓月石城行落曛因聲寄妻子此外復何云
介立上人房同子諒

曲折層層上躋幽不覺難松篁檐際合緇素碧相看參
罷三衣整齋餘一鉢寒湯休何款洽客至適吟安
酬盛子山雨中涉水過饑鳳軒作

厭茲闐闐雨無復山中情可歎芭蕉上終朝傳此聲君
來積水外何處滄浪清相對在前古頽然魯兩生
客廣陵偕季平園次子久集介子園圃同作九日
二仲來城外閉門良以高菊荒猶栗里巾廢負松醪客
意如聞雁人情類反騷夜遊差獨異星月見霜毛

聞雁

朔風吹一雁有客惜離羣衡岳幾時到江鄉不可聞
嘆殘生海日哀極動星文獨滿平生耳誰將此慟分

孟貞過黃州有作見懷感答

長江日夜流江岸有黃州是我十年夢翰君一日遊山

言三
從樊口密月對武昌愁處處邀篇翰殘黎豈解酬
就枕又作

婦病何時愈兒寒已自號感深心動色愁極鬢催毛曉
楊疑冰水秋衾卽布袍悔無名士福昨夜讀離騷

燈前懷亾室

竟日猶塵事燈前淚暗流不知何處靜堪著此生愁素
幔飄風卷空房黠鼠遊人閒惟此夜三夏似窮秋

尊五童子宋桂以農忙暫歸全椒

材大人皆借農忙獨自歸過江船淼淼到岸柳依依黃
犢因何瘦青苗從此肥莫貪雞黍飽忘卻北山薇

七日會飲送秋屏之全椒

不舍忘憂物壺中卽考槃雙星今夕會吾黨醉相看別
緒猶侵暑歸期莫待寒過江新雨足得句故人歡

向願書宣乞火米

老斷百思想心同焦穀芽還將書乞米最喜粒如花酒
徑充肴下餐宜飲水加屠門吾不過持向小兒誇

送五舅歸黃州

先母多兄弟今看一舅存無兒年八十有淚憶孤村歧
路眞成別江帆不易論到家畱白髮青眼對乾坤

蘇嶺書齋逢陳北固表弟卽送歸里

闊別忘年代相逢道姓名一時中表會三紀故鄉情晚
節存高蹈歸帆過舊京後期方袞袞春酒話長生
虎邱舊寓追憶張醒公楊維斗許孟宏楊曰補諸子
春水劍池平香臺世外情舊巢仍見燕新葉不藏鶯歲
月司來往風塵老姓名俊遊誰悉記今雨誤前生
長干塔下看月同師一上人

季秋十五夜月采勝中秋潔與新霜近清無一雁遊塔
光非舍利寶地冠神州更共高僧話全忘白日愁
丙辰長至前一日上花笑軒晤蒲道人因成一詩
策杖尋師處荒村建子天忘形非一日添老又三年行

李書偏重風霜石益堅贊公房可宿鐙影至今傳

北山毖茗

雪罷寒星出山泉夜煮冰高窗斟茗茗遠壑見孤鐙拾
級瓢常潤歸房杖可憑下方鐘鼓發殘月又東升

孟夏客眞州宋子右文招飲江深閣同紀大藁子

寓扉嫌近市洗眼見澄江復此登風榭渾如坐釣艘看
山人面醜對酒客心降遑遑歡娛後乾坤事滿腔

偶見詩選有昔年仲兒世屢燕子磯詩鐵積千年石潮
歸萬古痕之句驚嘆淚下一詩傷之

兒亾二十載把卷忽滂沱命天皆因窶詩傳不在多潮

歸聲似泣石爛恨難磨燕子磯邊棹何堪歲歲過
訪奚蘇嶺表弟於澄江官舍

與君同自出童穉便交深一別迷時地重逢具古今理
勢龔遂手去國管寧心契闊添親厚非徒比盍簪
蒼峴邀泛梁溪

沿溪望不徹極浦復遙岑青草湖偏遠黃梅雨故陰船
衝魚斲過人話柳隄深多謝梁高士芳名借至今
花時貰縵袍

傲縵空將去何曾及米薪長饑從入口難負是三春共
笑無衣叟方誇獨樂身號寒終有日不悔見癡真

江南傷水潦城北自花開憂世非吾事爲歡在不才袍
如春雁去酒似晚湖來正使成平奏于人何與哉

泊秦郵贈劉雪舫

宿槩傍秦郵城中訪故侯攢眉驚馬隊容膝到瓜疇世
界湖天迴門庭竹柏幽寧論今夕異只作本林邱

送歸元恭歸吳

別離三十年相見各皤然尙有論文興而無沽酒錢客
中吾送子江上水連天世界多荆棘行行必慎旃

中秋譙李三友池上

秋天雲日好何必盡晴空疎雨來無迹清尊趣不同煙

霞深薜荔燈火淨梧桐免被嫦娥見年年羈旅中

八月八日同天章任公飲廬山張子齋中歸經一草亭
夜談紀興

步出蓬蒿徑還過一草亭僧扉知不遠客屐恰須停夜
雨傳盃靜秋鐙說鬼青征鴻太嘹唳幸得醉中聽

登多景樓

乘興不能遠來登多景樓夕陽江色異甘露寺門秋草
木添新恨漁樵減舊遊步歸妨小梗躍馬遍林邱

過昭關題壁

昭關傳此地楚客復經行廟貌丹青薄風煙禾黍平欽

崇因國士瞻顧帶鄉情頭白今秋極真愁見者驚
題蒲道人亭子壁

倦客時吟望老僧虛此亭雪消江始白春至草初青一
室能周覽雙扉自可扃錫山歸棹便應向此中停

柘皋早發

早發柘皋鎮出門疑五更水田先作曉山路幾時平後
騎風相逐前人影漸明翻愁羣動起亂我百蟲聲
天章酌我

久客防人面相看一友生秋深添酒味老至減詩情荷
葉幾時破草蟲行處鳴寒衣曾未寄心反怯歸程

言三
信宿燕磯山閣大雪逢初度作

雪光形水濁風力束江高曠野翻無岸中流豈有舸南
歸期又展東望首重搔悔負毘陵約長歌散鬱陶

邂逅張子酒肆夜歸寺寓踏凍作

取醉尋歸徑陂陀折幾層山荒聞虎嘯江黑見魚燈燦
燦泥如石琮琤水似冰應須乘凍去詰旦更南登

倦圃詩爲秋岳賦

谿山真意閣前故對滄浪帖石雲生罅牽蘿翠繞廊蕉
深垂露重松老落花香意頗思鄰近村西問草堂

此地推林壑朱家放鶴洲繡衣心更遠倦圃地偏幽萬

竹干霄去雙橋信水流遶園無限好收拾在扁舟
宇宙行金令江山草木稀如何東嶺樹直可數人圍陰
密長含潤風生歛動衣鶯聲幸親切不到上頭飛

清明客瓜渚作

又值清明節春晴只苦風鄉關惟我遠野哭與誰同亂
世紙錢薄荒江兵馬雄飄萍多少淚半落酒杯中

含山道中

停策含山郭周遭似短垣城門掛弓矢池水動波瀾返
照全疑旭非楓亦是丹計程金斗近懷抱若爲寬
甲子仲春飯壽福精舍賦謝練江和尚南枝法嗣

隔宿觀雲物行將戒弈棋

余有此癖往
往廢時失事

堅然辭顯者一

意赴幽期香潔伊蒲饌清新賈島詩北歸逢細雨霑洒亦相宜

春日景濂池上

比屋皆春色無如此地深池光搖麗日天宇豁疎襟弱柳含離思繁花有素心先生真好我得酒不孤斟

青岳寓園海棠下同秋水作

幾日不相見海棠花盡開枝頭飛蛺蝶根下長莓苔直覺春風滿還疑返照來主人元共學不異故園栽

瞻雲堂同素園用晴山二字

三春如此少快雨復時晴豐歉農無益悲歡酒有情花
將貽芍藥節已屆朱明寂寂天之外支頤且聽鶯
有客來南郭伊余自北山多君能兩得卜宅在中閒草
色階心到花魂酒面還年年悲此月消遣用追攀
遭跌傷甚秋水惕齋枉問賦謝

好是全歸日何須作半人雖然畱視息難以報君親爰

爰三公臂

先是止患臂痛

荒荒五嶽身古交徵在患二仲獨情

親

逸叟招同粲叟瞻雲堂看菊

冬日上南堂黃花照耀黃分明筵畔見卻在酒中香世

薄陶潛賤年衰鄧禹傷滄溟不可到除醉更無鄉

東熊青岳

詩到無心處如傳空谷麈直從非想想貴以不能能鳧

釋開熊繹平陵啟杜陵

蘇子卿杜陵人父建封平陵侯

要言殊簡截戒

與小人乘

偶論詩

世態從誰論吾衰亦已哉春還隨地到梅自逐年開鬱

鬱隆中路棲棲劍外才向來應誤聽實有歎如雷

幽棲寺

獨往幽棲寺飛雲送杖藜峰深人境外翠繞郭門西可

愛無戎馬而聞有竹雞梁文畱盛代未許換新題

獨坐幽棲寺琳宮絕頂開烟嵐瞻北盡雷雨暗西來遠
色包滄海奇聲裂石臺遙知韋刺史喜極把空杯

獨臥幽棲寺北扉山雨餘寒從三伏甚風至兩崖徐樹
杪泉無改雲根潤自如羲皇真有夢莊蝶亦非虛

騰九日敬修過存息交堂卽事二首

呼門來上客童子不妨磨一笑吾何有相看罷未能魚
非烹丙穴酒自酌巴陵肯怨無供給源源興可乘

嘗愛虞翻語於今益信哉一人知乃徹三爵戒方開子

患疥戒酒今日方開水不迷吳隱金難聘楚材時卻修彝嘆驚帝

聽今夜有轟雷

友人過晤率贈二首

頽齡多病後相見即奇緣陽長幽人吉朋來大蹇痊管

甯寒整帽張翰老歸船筆墨存真率先成一兩篇

快友今難作

謂王二

西江復此人叫呼偏不厭面目果

然真遠邴忠移孝

君稱有子克孝

披肝僕勝臣

君有僕割肝活主

妙年

方六十愧我五朝身

丙寅季冬酌公調紅梅下同用紅梅二字

為鄰俱避世各守一牆東聞爾書窗下梅花信已通未

回苔蘚綠早奪海棠紅

數年前曾於花下賞海棠即今種梅之地

繞樹看顏

色何曾畏朔風

八十孫思邈荆扉不浪開
溫香畱白叟暖壽愛紅梅
臘月春風面冰天雪窖才
瓦盆年亦老共醉一千回

丙寅陽月尙默載酒問病賦謝

連日寒侵骨回天在一
厄容情翻作主友誼暫停師

尙默

授徒特舍而醉話千金諾
衰存一介知迹疏神轉密
於此息然疑

懷人多病後意外荷盤餐
晝漏三杯足冰天一塊寒
對談聾叟畧迎笑蹇夫寬
殘臘應圖報支筇或不難

立冬前一夕小飲月樹齋

秋月惟今夕僊郎共一樽
果蔬俱可廢詩律徑須論
風

言三
定塵如埽天高雁不言非君真嗜好誰想此幽軒
丙寅除日和熊愚齋韻

循環除不盡日月迭而微自信無求索蕭然面掩扉有
詩惟頌酒無事可知非獻歲親安在萊衣變草衣

丁卯客維揚汪蛟門見招談燕之作

一雨得深涼斯軒亞草堂情親緣契闊意遠亦蒼茫照
酒朱花正淩風碧篠長異時談此聚明日是端陽

喜晴五月二十日同蔣伯子

雖復愁炎熱新晴亦喜晴池蛙誰使默皋鶴不禁鳴漸
有奇峰起能令積水明篋衣俱欲曬北阮倍關情

送北固表弟歸楚

母黨諸兄鮮他鄉表弟貧難離經闕別來遠自殘春不改青鞵舊徒添白髮新無家茲足感端爲念吾親

又復何年會能忘六月寒攢眉珠粒貴袖手縵袍單北雁來疑退東風去不難估船回轉捷書札報平安

故園誰復在君去向西陵不見方山子當參槁木僧湖南猶戍鼓世外自禪鐙聞說婆心切菴扉叩卽應

臨觴忽淚下此意豈離憂歎息吾先祖何曾有一邱青燐經戰陣白骨老春秋葬伯知君孝高情當麥舟古杏花邨尋友

野夫不識路逐步問君家但見新荆棘會無古杏花風
傳林杪磬煙起竹間茶始至幽樓地行遲漸日斜
于一過訪

頻遷不離北悠遠費君尋夜雨泥偏厚春風草又深百
憂俱在眼一笑是何心茶罷無他設盤餐也陸沈

于一過訪因圃同韓臣前民作

老我窺天意歡常與戚謀不知今夕聚又得幾時愁孝
婦何關雨騷人自怕秋漁樵相枕處心事獨悠悠

秋雨

砌蛩鳴不絕園柳綠侵稀尙有黃鸝至時間木葉飛客

心方悄悄秋雨故微微凜凜新寒色何人爲投衣

哭邢孟貞

偶過城南去驚聞老友亾湖陰風雨散石臼水雲荒一卷詩辛苦三生路杳茫遺文早收拾吾代孟襄陽

長干阿育王塔詩

截業長干塔莊嚴三百年向來俱草創及此始精堅大顯康僧會恢弘吳主權憑空收海嶽拔地半人天旭映鍾山紫燈齊象緯懸皇居由此壯帝夢至今傳聖感誰舒眼宋時名塔慈恩莫比肩梁思籠萬象寶網護三禪銅塔頂爲外國所進題金如草風磨銅價倍黃金香臺玉琢蓮世尊悲下界

迦葉笑層巔高使雷霆鬪孤令風雨偏行雲時側睨滿
月始平圓最巖排瓊戶屢屐錯錦塵八欄鈴怖鶴九級
勢迴鳶頗困詞臣筆曾傾內府錢無雙華震旦不二拱
幽燕勝概胡僧拜真形國手鐫祠猶隣木末門不對金
川重整功都講新規煥大千鉤心還鬪角豹尾復螭顛
舍利光常住菩提樹隱然登危須定力觀瑞有奇緣誰
估琉璃價應沈韎鞞船報恩殊不細開國鼎常遷末法
無真衲先朝有賜田徒然揉目客不見點頭篇丹碧秋
增麗虛無晝有煙竦身思矯矯寄想亦仙仙目力窮何
際心旌搖可憐何當凌絕頂一覽折中邊

賀黃澹巖初度時方考選

里社元相望冠裳幾泣盟論年余後出師德爾先生抱
膝隆中久觀書圯上明日張西楚幟何止北軍驚高第
歸風雅雄文吐性情空羣聞自昨相士一惟誠戶適羅
叢桂卮當泛菊英致君時未晚服政歲初盈始滿公無
愧如陵頌有聲詩深元卽易寶善豈言珩黃髮看猶早
青蒲匪爲榮螭頭扞譽謬龍尾著忠貞房魏瞻吾黨何
須露不平

詩二

黃岡陶炯照校